

كثير يا امه وحشتيني

.....

بقولوا يا أمي عيدك يوم
تاريخ عند البشر معلوم
وعيدك يا امه دايم دوم
يا سييحة حبها بنجوم
يا حنية تغوص وتعم
وحشتيني
كثير يا امه وحشتيني
يا ساكنة عمري وسنيني
ومع إنك فارقتيني
ف رحلة تدوم
لكن فاكرة تفاصيلك
وخوفك لما بشكيلك
ولهفة لما بحكيلك
وصوتك لما بناديك
يا كل الكون
وحشتيني
كثير يا امه وحشتيني

بلمسة إيدك الدافية بتشفيني
وبالفاتحة بترقيني
وحضنك كان بيحميني
وبتحسي بعطشي يا امه تسقيني
ورغم ده كله فتيني
وحشتيني
لا كان خاطرك ولا خاطري تفرقيني
سنين فانت كثير يا امه
وحشني العيلة واللمة
وضحك الخالة والعمة
وايدك لما بتلمس علي راسي
تدفي الروح وإحساسي
يا نبراسي يا ونسي وكل جلاسي
وحشتيني
وحشني دعوتك ليا
وضمة فيها حنية
وجلسة وقت عصرية
ولقمة جميلة وهنية
وحشتيني
كثير يا امه وحشتيني

كل مساحتي إتمسح منها الأمل

.....

الأماكن كلها تشهد عليك

لما ضيقت المشاعر وبإديك

واتحرم إحساسي من نظرة عنيك

هشتكيك

هشتكيك للشمس ف البرد تجافيك

لما تحتاجها ما يوم تنده عليك

هشتكيك

هشتكيك لليل بطوله يسهرك

يخطف النوم من عيونك يهجرك

هشتكيك

هشتكيك للبحر والموج الشديد

يمنعك تركب فلوكة أو تعيد

ذكرياتك لما كنت ف يوم سعيد

هشتكيك

هشتكيك للصبح يتأخر ساعات

يحبسك ف الضلمة مع مر الأهات

هشتكي قلبك لأوراق الشجر

للتراب والرمل و عفار الحجر

هشتكك

هشتكك للشعر لما هتكتبه
تهرب القافية وصمتك يغلبه

كل مساحاتي اتمسح منها الأمل
في الوصال لو وهم ممكن يحتمل
حتي فراغاتي خطوطها بتكتمل
يأس مع حيرة وظوفان من ملل
والممل دائما نهايات الجمل